



# HISPANIA

HISPANIA VNDIQUE ALLVITVR MARI, excepto eo latere quo Galliam cōtingit, ibi enim altissimis Pyreneis montibus secernit̄ ab ea. Hac olim in tres fuit distincta partes, Baticam scilicet, Lusitaniam & Tarraconensem. Et secundum Berosum primus rex eius fuit Tubal, Nohæ nepos: qui uidens terram aptam pro pecoribus nutriendis, studuit in ea propagare rem pecuariam, unde & terram hinc uocatā putant Tarraconam, quasi תרין קריא id est, bouum possessio. Huic successit Iberus, à quo fluuius Iberus denominatus est, & regio quam perlabitur Celtiberia. Sextum regem asserunt fuisse Betum, à quo Batica regio nomen accepit. Decimus rex fuit Hispanus, aut secundum alios Hispalus, qui toti regioni Hispaniæ nomen reliquit. Duodecimus fuit Hesperus, à quo etiã Hispania Hesperia appellata est. Decimus septimus fuit Lusus, à quo Lusitania, quæ hodie est Portugallia, denominata est. Quando uero Romani imperare cœperunt in Hispania, diuisa fuit in duas prouincias, Baticam scilicet & Tarraconensem, durauitq; illa diuisio usq; ad Attilam, qui rursus aliam in ea fecit distinctionem. Posteris uero temporibus diuisa fuit in quinque regna, Galliciam, Nauarram, Castiliam seu Legionũ regnum, Cataloniam, quæ & Arragonia est, Portugallia & Granatam. Gallicia non diu proprium habuit regem, ideo in numerum non uenit.